

徽縣志卷之六

人物下

節婦

元

米氏夫早卒誓不再醮躬執紡績孝事舅姑志若金

石至元十五年旌其門

明

郭璣妻浚氏璣早卒浚忍饑力田自活艱辛萬狀撫

遺孤垂三十年鄉無閒言知州白松以聞旌其門

後以子從道貴誥贈太宜人

韓邦奇立傳

杜志賢妻閭氏于歸未幾志賢卒閭有妊或諷使他
適閭曰吾誓不二天況有妊乎後果生子貧苦自
勵終不改節以壽終

鄧錦妻趙氏錦卒氏年少遺孤皆在襁褓中撫孤成
立垂四十年無非間者

庠生郭從先妻黨氏年十九先卒焚香自誓以死守

節孝養舅姑志色不衰人咸以貞孝婦稱之

臨城知縣郭師游妻楊氏游卒於官楊飲酖欲死以

救甦者紳喬若雯等勸以撫孤大義乃不死奮然

扶櫬歸治生訓子門庭肅然以壽終

羅世錫詩誄之

庠生郭維錫妻楊氏錫卒氏年二十二撫孤成立垂

五十年冰雪其操院撫州屢旌其門

郭僑妻盧氏僑疾革謂盧曰卿年少無子我死可速

嫁盧誓不再適竟以節終

于一化妻許氏父萬倉幼年教以讀書知古今事化卒氏年甫十九子尙提抱爲人傭織以葬其夫撫子成立壽至八十餘撫按旌表其門

庠生郭維亨妻李氏年二十四撫孤守志垂六十年以壽終

庠生張統妻任氏統卒氏年二十一奉事舅姑維謹及舅姑歿殯葬如禮以壽終

何才妻楊氏時值寇亂才病篤謂楊曰家貧子幼時

又多難吾死目不能瞑楊曰妾稍有負泉下難相
見也才卒楊於亂離中攜孤跋涉備嘗艱苦卒撫
之成以完其志

庠生郭篆妻郭氏年二十篆歿茹苦守節四十餘年
教子成立以壽終

郭隣秦母楊氏夫卒無子撫遺姪隣秦以見志流離
患難志操益堅噫有楊之節郭氏斯有子也

國朝

庠生張聖化妻楊氏化死於賊氏躬行紡績刻苦訓
子年六十餘終康熙五十八年學院逢表其門

張才遠妻杜氏遠歿氏年二十二送葬如禮撫孤成
人事翁姑以孝稱御史何承都檄扁建坊

劉用極妻楊氏極卒氏年二十二甘貧守節撫子成
立垂五十年

庠生范應龍妻賈氏夫亡年少紡績鍼黹以資幼子

讀書三十年志如金石

蓬州知州馬一鴻妻王氏以夫無子置妾四無出鴻
卒於官氏奉姑惟謹撫姪承祧如已出焉或有以
年少諷之者遂翦髮自誓志堅不移竟能承先啓
後遠近稱賢

孫允妻張氏允卒氏年三十耽貧茹苦訓孤子世偉
讀書入庠貞節四十餘年

庠生楊九德妻張氏郡紳紘之女未笄能讀書通禮
節明季德死於賊氏年二十餘子幼居家嚴謹雖

童僕不敢入門貞志三十年無非閒者

朱英妻鄭氏英卒氏年二十五舅姑篤老二子襁褓
孝親撫孤垂三十五年親喪盡禮子亦成立人稱
孝慈兩全

庠生杜士奇妻韋氏闖逆之擾夫婦遇賊奇被害氏
伏抱夫尸罵賊誓同死賊義之釋去氏負尸出城
以禮葬之祝曰吾非不欲同穴也延生撫二子爾
守貧教子入庠州人欽其節義

王朝舉妻焦氏舉卒氏年未三十時遭兵燹乃誓節耐貧撫子子甫入庠尋死婦又嫁氏撫孤孫至成立三孫女皆氏親自擇配重苦奇節至七十餘

庠生鄧際泰妻石氏夫故欲從死夢夫謂曰死節易守節難汝盍爲其難者翌日述語人卽毅然以奉親撫孤爲已任垂五十餘年人無閒言以壽終乾隆九年獲表

庠生袁諮訪妻趙氏訪卒氏年十九家貧姑老織紵

自活脩歷艱辛初終孝養罔缺營葬盡禮育弱子
容德成名宗黨服其風訓年八十以壽終乾隆十
七年獲表

程秉仁妻蔣氏年十六歸秉仁生一子瑾甫二齡秉
仁病篤囑曰我死汝當改嫁氏含淚曰不爲老母
幼子當從君於地下矣夫亡翦髮自誓次子瑜遺
腹生也晝則撿薪以供甘旨夜則紡績以教二子
勤苦垂四十年乾隆十一年獲表

庠生周宏典妻高氏典臨卒以老母穉子爲囑氏年
二十三矢志守節事姑誠謹無僞姑嘗製孝敬二
學於衣予之教育孤子賴以成立乾隆十一年獲
表

童克祥妻張氏年十七適祥甫二載祥病甚死而復
甦顧謂氏曰我死如老親幼子何氏泣跪床下願
身任之祥歎息而逝氏躬織紵奉養無缺康熙五
十九年秋地震姑方卧疾氏身負姑而出屋圯姑

得無恙遺孤養直從塾歸氏篝燈夜績輒令燈畔
誦讀後遂有成乾隆二十五年獲表

李權妻尹氏年十七權卒生一子甫數月舅姑衰老
氏以子職自任事養罔缺苦節垂六十年子孫皆
見成立乾隆四十八年獲表

庠生高建中妻楊氏畧陽楊大任女幼嫻姆訓習經
書歸建中生三子年二十餘夫亡氏曰丈夫以義
婦人以節我能育孤成人是我志也事舅姑以孝

訓子堅冰有法守節垂五十年子葵雅福皆成名
壽終之日孫正志亦已入庠乾隆四十九年獲表
廩生鄧林妻趙氏林卒氏年二十六舅姑在堂二子
襁褓氏專事織紵能辦生事舅姑歿喪葬如禮鄉
黨咸稱其孝訓督二子無懈日四壁蕭然宴如也
建州弱冠入邑庠建都亦早成立克成氏志乾隆
四十九年獲表

廩生張正性妻高氏年二十五夫亡正性有弟亦相

繼而卒氏子幼孤寡家徒壁立人咸勸之改適而
氏不聞也旣免喪家人又復敦喻於氏幾欲自盡
遂弗奪其志苦貞三十七載全憑十指度活教子
訓導有方卒能成立乾隆四十二年獲表

趙國才妻王氏才亡氏年二十三生二子孀居事親
撫孤貞志惟一終身不出庭戶蔬食自奉苦節三
十年乾隆五十一年獲表

梁文周妻劉氏夫亡年二十餘子幼家貧紡績度日

雖爨火常不繼而矢志益堅苦節四十餘年二子
光彩光耀能事其母里人稱之

山維翰妻王氏年二十七翰卒無子氏撫姪興楠如
已出事繼姑張氏孝養無缺辛苦脩嘗四十餘年
以壽終

胡繩章妻楊氏早寡毀面自誓家人不能奪其操上
事翁姑克盡孝養撫幼子業儒督之甚嚴俾其成
立守節五十餘年以壽終乾隆五十一年獲表

焦正權妻張氏年二十四夫亡窮苦無倚躬紡織以
事堂上竝力營其喪葬守節三十餘載鄉里欽之
乾隆五十八年獲表

監生王爵妻張氏爵卒氏年二十六三子皆在襁褓
習苦食貧垂四十餘年力營三葬三子咸教之成
立嘉慶五年獲表

鄭艷妻王氏年二十三夫亡子儒甫三齡孀居撫孤
脩茹艱苦儒入庠氏謂儒曰汝家九世儒庠及汝